




學 生 國 學 叢 書

王鍾麒選註

三國志

上

商務印書館發行

選註者

王鍾麒

主編者

王雲五
朱經農

學
生
國
學
叢
書

三

國

志

上
冊

商務印書館發行

學生國學叢書編例

一、中學以上國文功課，重在課外閱讀，自力攻求，教師則爲之指導焉耳。惟重篇巨帙，釋解紛繁，得失互見，將使學生披沙而得金，貫散以成統，殊非時力所許。是有需乎經過整理之書篇矣。本館鑒此，遂有學生國學叢書之輯。

一、本叢書所收，均重要著作。略舉大凡：經部如詩、禮、春秋、史部如史、漢、五代、子部如莊、孟、荀、韓，並皆刊入；文辭則上溯漢、魏，下迄近代，詩歌則陶、謝、李、杜，均有單本，詞則多采五代、兩宋，曲則擷取元、明大家，傳奇、小說，亦選其英。

一、諸書選輯各篇，以足以表見其書，其作家之思想精神、文學技術者爲準。其無關宏旨者，概從刪削。所選之篇類，不省節，以免割裂之病。

一、諸書均爲分段落，作句讀，以便省覽。

一、諸書均有注釋。古籍異釋紛如，則采其較長者。

一、諸書較爲罕見之字，均注音切，並附注音字母，以便諷誦。

一、諸書卷首，均有新序，述作者生平、本書概要，凡所以示學生研究門徑者，不厭其詳。

一、編者識力有限，固陋在所難免。當世學人寵而教之，無不樂承。

緒言

一 三國時勢之鳥瞰

中國民族由極盛之兩漢以轉入中衰之六朝，三國紛擾，實尸其咎。蓋自漢獻帝初平元年之廢立以迄晉武帝太康元年之平吳，先後凡經九十年（一九〇——二八〇）此九十年中，英雄角逐，禍結兵連，民生其間，幾無日不在動盪變幻中，誠中古史上一大時代也。

東漢以還，羌胡時動，中朝有事西陲，輒仍歲累月而不解，以故精兵猛士恆聚於涼州。其後羌燄雖戢，而重兵所在，終爲亂階。何進之後，曹操之前，撓朝政而亂皇室者，胥涼州將士也。董卓肆虐，特其先驅焉耳。卓本六郡良家子，選爲羽林郎，累功拜并州刺史，河東太守，前將軍。會以何進之謀，遂將兵入朝，脅弑太后，廢

立由己，務爲威猛。時渤海太守袁紹之徒凡十餘鎮，各興義兵，同盟西討。於是卓遷帝長安，悉燒洛陽宮廟官府居家，二百里內，無復孑遺。諸鎮兵之討卓者，又多爲卓敗。卓益縱恣，羣僚惴惴，莫能自固。司徒王允乃密結呂布、士孫瑞等以計誅殺之。卓死，其故部曲李傕、郭汜、張濟、樊稠等復入長安，殺王允，逐呂布，遂自爲將軍，封列侯。傕、汜、稠共秉朝政，而濟則出屯弘農。旣而傕、稠相猜，傕刺殺稠。汜復治兵相攻。張濟自陝來和解，帝亦與張楊、楊奉、董承等謀，乘間東歸。密招故白波帥李樂、韓暹、胡才等爲助，始得於建安元年（一九六）之七月展轉還洛陽。時諸將爭權，干亂政事。董承乃潛召兗州牧曹操，冀相鎮定。操將兵詣闕，以洛陽殘破，移帝都許。楊奉、韓暹等欲要車駕，操擊之，皆散走。數年之間，奉、暹及李樂、胡才、張濟、郭汜、李傕、張楊皆爲曹操所夷滅，由是權歸曹氏，天子總已，百官備員而已。

初，靈帝末葉，（一八四年後）黃巾大起，所在燔燒官府，劫略聚邑，州郡失據，長吏多逃亡。京師震動，發天下精兵，遣北中郎將盧植、左中郎將皇甫嵩、右中

郎將朱儁分道討治，僅乃破滅。而事定之後，州牧郡守轉得各擅當地之財賦甲兵，以便宜行事矣。方董卓盛時，州郡諸鎮之同盟西征，內實爲己。蓋其時劉氏必亡之象已爲人所共知，故各爲自立之計，而務爲兼并相攻伐。史載跨州連郡之雄凡十餘：

袁紹居鄴，并冀、青、幽、并四州。

曹操居鄆，并兗、豫二州。

袁術居壽春，據揚州、徐州。

陶謙居彭城，後劉備、呂布迭居下邳，先後據徐州。

劉表居襄陽，并荊州。

劉焉居綿竹，并益州。

馬騰、韓遂居隴右，并涼州。

劉虞居薊，公孫瓚居易，據幽州。

公孫度居襄平，并營州。

孫策居吳，并揚州、交州。

張魯居南鄭，據漢中郡。

董卓既亡，漢帝都許，依曹氏，而天下相爭益亟。先是，初平三年（一九二）誅董卓，關中大亂，黃巾餘衆入兗州，殺劉岱。鮑信等乃迎曹操爲兗州牧，討黃巾，降之。鮑信死焉。興平元年（一九四）操攻陶謙，而呂布襲鄆，兗州郡縣多失。操乃還是歲，陶謙死，劉備代之。二年，操攻張邈，殺之，兗州復定。建安元年九月，操迎獻帝於洛陽，遂挾以遷許，自爲司空行車騎將軍。是冬，呂布襲劉備，備奔操。三年十月，操攻呂布於下邳，禽殺之。時袁術亦死，操遂并徐州。四年，袁紹既并公孫瓚（劉虞先爲瓚所殺），兼四州之地，衆十餘萬，進軍攻許。許都大震，操拒之官渡。十二月，劉備以與董承等謀誅曹操，求外出，復到下邳。五年正月，承等謀洩，皆死，操遂自將擊備破之。備奔袁紹。十月，操與紹戰於官渡，大破之。七年，紹死，子尚代，與兄

譚相攻。九年三月，操擊尙，大破之。袁氏餘衆奔烏桓。操遂并有青、冀、幽、并四州之地。十二年，操進逐烏桓，定遼東。十三年，漢罷三公官，以操爲丞相。是年八月，劉表死，操擊荊州，表子琮降。劉備時在荊州，及琮降，奔夏口。十二月，操自江陵窮追擊備。

時曹操已據有北方，而孫策之弟權亦已略定江東；南北分雄，隱相敵對，所不爲曹、孫夷滅者，惟有涼州之馬、韓，益州之劉，南鄭之張，營州之公孫與夫流離奔亡之劉備而已。備到夏口，乃使諸葛亮東說孫權，同拒曹操。權遂以周瑜、程普爲左右督，將兵與備并力逆操，遇於赤壁。初一交戰，操軍不利，引次江北。瑜等在南岸，以計燒其船艦，并及北岸營落，於是大破操軍，追至南郡，操僅以身免。赤壁戰後，周瑜渡江與曹仁相拒，孫權亦自將圍合肥。曹操南侵之志既垂，獲申，遂一意西圖，擊降張魯，殺馬騰，破韓遂及騰子超，乃并有涼州。劉備亦以益間略定荊州，西并巴蜀，破降劉焉之子璋，并有益州。於是三分局定，而魏、蜀、吳之

始基由此奠矣。

建安十八年（二一三），曹操自立爲魏公，受九錫。二十一年，自進爲魏王。二十五年正月死。子丕嗣立，改是年爲延康元年，旋篡漢，復改元黃初（二二〇），是爲魏文帝。劉備聞之，乃自立爲皇帝，改元章武（二二一），是爲蜀漢昭烈帝。孫權旣敗曹操，北向無功，遂以建安二十三年（二一八）與操和，操表權爲驃騎將軍，假節領荊州牧，封南昌侯。及魏代漢，魏以權爲大將軍，使持節督交州，領荊州牧事，封吳王，加九錫。權雖外託事魏，而陰實觀望，遂改黃初三年爲黃武元年（二二二），臨江拒守。然猶與魏文相往來，逾年始絕。越七年，權自立爲皇帝，更元黃龍（二二九），是爲吳大帝。至是，三方鼎立，各不相下，而三國之名乃大定。

自此以後，直至蜀漢滅亡之歲，三方鼎峙者凡四十四年（二二〇——二六三），而實際地位仍以魏占優勢，故其力常足左右大局。蜀、吳則聯兵拒守，僅

克自保而已。以是，蜀雖有忠貞幹濟之諸葛亮，亦惟坐困疆場，不能大展，而司馬懿父子反得憑藉魏政以自肥。初，魏明帝（丕子叡）死，無子，養子齊王芳立，以曹爽與司馬懿輔政。懿先已擊斬公孫淵（度之孫），平遼東，重兵在握，瞻視非常，正始九年（二四八）遂計殺曹爽，改元嘉平，由是魏政出司馬氏矣。

嘉平三年（二五一）司馬懿死，子師輔政。六年，魏帝（芳）爲師所廢，別立文帝孫高貴鄉公髦。正元二年（二五五）師死，弟昭輔政。甘露五年，帝髦不甘坐見廢辱，自出討昭，反爲昭左右所弑。昭復立武帝孫陳留王奂，改元景元（二六〇）遂自爲相國，封晉公，加九錫。四年，遣鄧艾、鍾會等滅蜀。咸熙元年（二六四）昭進爵晉王。二年，昭死，子炎嗣立，卽於是年十二月篡魏，是爲晉武帝。魏自文帝黃初元年至此，凡五世，四十六年而亡。

蜀漢昭烈帝章武元年，吳將呂蒙入荊州，襲殺關羽。帝自將伐吳，大敗於夷陵，走還永安。二年死，子禪立，改元建興（二二三）是爲後主。丞相諸葛亮與吳

連和，先征南中以杜內顧，然後六出祁山以爭中原，率以餉運不繼，死於五丈原，時建興十二年（二三四）也。亮死而蜀政始敝，姜維治兵於外，一意北侵；黃皓竊柄於內，務爲牽掣；後主闇弱，一任所爲。及炎興元年（二六三），魏兵入成都，後主出降。蜀漢自章武元年至此，凡二世，四十三年而亡。後主入洛陽，魏封爲安樂公，至晉泰始七年（二七一）始死。

吳大帝中葉（二四二），太子登死，更以子和爲太子。又愛少子霸，寵遇無殊，遂啓霸謀，屢讒和。帝知而大怒，殺霸廢和，更以子亮爲太子。及死，亮立（二五二）是爲廢帝。時孫峻搆殺諸葛恪，自爲丞相大將軍，窮極凶暴。未幾，峻死，從弟繇代執政，以帝漸長親政，明習國事，懼有所失，遂廢爲會稽王，而迎立其兄瑯琊王休，是爲景帝。景帝卽位（二五八），族誅繇，永安七年，適當魏滅蜀之歲，帝死，以嗣子幼冲，諸大臣乃迎故太子和子烏程侯皓立之（二六四）。皓性驕暴，耽酒色，濫刑罰，吳政大亂。甘露元年（二六五），晉篡魏，天紀四年（二八〇），晉

師大至，皓降，晉封爲歸命侯。至太康五年（二八四），死於洛陽。吳自黃龍元年稱帝至此，凡四世，五十二年而亡。於是中國復歸一統，上距蜀漢滅亡之歲已十六年矣。

二 三國史蹟之撰述

三國史蹟，當世已有撰述。魏黃初、太和中（二二〇——二三二），命尙書衛覬、繆襲草創紀傳，累載不成。又命侍中韋誕、應璩、秘書監王沈、大將軍從事中郎阮籍、司徒右長史孫資、司隸校尉傅玄等復共撰定。其後王沈獨就其業，勒成魏書四十四卷。其書多爲時諱，殊非實錄。吳大帝之季年（二五一年頃），始命太史令丁孚、郎中項峻撰吳書。孚、峻俱非史才，其文不足紀錄，至少帝時（二五八——二六三），更勅韋曜、周昭、薛瑩、梁廣、華覈訪求往事，相與記述，並作之中曜、瑩爲首。當歸命侯時（二六四——二八〇），昭、廣先亡，曜、瑩徙黜，史官久闕，書遂無聞。覈表請召曜、瑩續成前史，其後曜獨終其書，定爲五十五卷。

至晉混一海內大同，著作陳壽乃集三國史撰爲國志（卽三國志）凡六十五篇，篇爲一卷。魏志三十卷，紀四，傳二十六，有后妃諸王，有方技，有夷狄。蜀志十五卷，吳志二十卷，君臣俱謂之傳。夏侯湛時亦箸魏書，見壽所作，便壞已草而罷。及壽卒，梁州大中正范頽表言：『國志明乎得失，辭多勸戒，有益風化，願垂採錄！』於是詔下河南尹就家寫其書。陳壽此作，本一家之私史，至是乃被采入官矣。

先是，魏京兆魚豢私撰魏史，事止明帝。其後孫盛撰魏代春秋，王隱撰蜀記，張勅撰吳錄，異聞錯出，其流最多。及劉宋之世（南北朝之初），文帝以國志載事傷於簡略，乃命中書郎裴松之兼採衆書，補注其闕。松之受詔爲注，雜引諸書，亦時下己意。綜其大致，約有六端：一曰引諸家之論以辨是非；一曰參諸書之說以核譌異；一曰傳所有之事詳其委曲；一曰傳所無之事補其闕佚；一曰傳所有之人詳其生平；一曰傳所無之人附以同類。其書網羅繁富，多過本書數倍，六朝

舊籍之今所不傳者尙一一見其匡略；又多首尾完具，不似酈道元之水經注、李善之文選注所載皆剪裁割裂之文也。故考證家取材不竭，轉相引據，而後世言三國志者皆以裴注爲定本焉。

至於三國志刻本，宋、元舊槧，已不易觀。據邵懿辰四庫簡目標注所載，知僅有北宋刻殘本，宋刊單蜀志、宋刊單吳志及元大德丙午朱天錫刊本等寥寥數本耳。明本則較多有：嘉靖蔡宙等刊本，有南監本，注作大字低一格，萬曆丙申祭酒馮夢禎校刻，頗佳；有陳仁錫刊評點本，注亦大字；又有毛氏汲古閣刻十七史本等。自清代以來，刻本乃綦衆。若武英殿附考證本，若席氏掃葉山房本，若金陵、成都兩局刻本，若新會陳氏覆刻殿本，俱尙易得；而就中以殿本及局刻本爲最通行。此外坊間繙刻及影印之本，則幾於所在多有，實亦不勝舉數矣。

三 陳壽傳略

陳壽字承祚，巴西安漢人也，少好學，師事同郡譙周。仕蜀爲觀閣令史。宦人

黃皓專弄威權，大臣皆曲意附之，壽獨不爲之屈。由是屢被譴黜。遭父喪，有疾，使婢丸藥，客往見之，鄉黨以爲貶議。及蜀平入晉，坐是沈滯者累年。司空張華愛其才，以壽雖不遠嫌，原情不至貶廢，舉爲孝廉，除佐著作郎，出補陽平令。撰蜀相諸葛亮集奏之，除著作郎，領本郡中正。撰魏、吳、蜀三國志，凡六十五篇，時人稱其善敘事，有良史之才。張華深善之，謂壽曰：『當以晉書相付耳。』其爲時所重如此。或云：丁儀、丁廙有盛名於魏，壽謂其子曰：『可覓千斛米見與，當爲尊公作佳傳。』丁不與之，竟不爲立傳。壽父爲馬謖參軍，謖爲諸葛亮所誅，壽父亦坐被髡。諸葛瞻又輕壽，壽爲亮立傳，謂亮將略非長，無應敵之才。言瞻惟工書，名過其實。議者以此少之。

張華將舉壽爲中書郎，荀勗忌華而疾壽，遂諷吏部遷壽爲長廣太守。辭母老，不就。杜預將之鎮，復薦之於帝，宜補黃散。（謂黃門侍郎與散騎常侍也）由是授御史治書。以母憂去職。母遺言令葬洛陽，壽遵其志，又坐不以母歸葬，竟被

貶議。後數歲，起爲太子中庶子，未拜。元康七年（晉惠帝丁巳歲，當西元二九七年）病卒，時年六十五。

壽又撰古國志五十篇，益都耆舊傳（益都當作益部）十篇，餘文章傳於世。

凡此皆晉書卷八十二陳壽本傳之大略也。自來著錄之家如宋晁公武、陳振孫，俱采壽書，而尙論略異。晁氏謂『其銜諸葛孔明、髡父而爲貶辭，求丁氏之米不獲，不立儀廙傳之類，亦未必然也。』（郡齋讀書志）陳氏則謂『乞米作佳傳，以私憾毀諸葛亮父子，難乎免物議矣。』（直齋書錄解題）一則於本傳或云之辭謂其未必然；一則深信不疑，惜其難免物議，持論似有不同，要皆惑於傳文矣。蓋索米一說，自北周柳虬、唐劉允濟、劉知幾皆信之，其所由來者深也。至清朱彝尊、杭世駿而力辨晉書之誣，大旨謂：

壽於魏文士惟爲王粲、衛覲五人立傳，粲取其興造制度，覲取其多識。